

Teruskan tradisi berbuka puasa dalam talam

SINAR HARIAN 6/7/15 (SENTRAL) M/S 37
KUANTAN - Universiti Malaysia Pahang (UMP) terus mengekalkan tradisinya di bulan Ramadan dengan menyediakan juadah berbuka puasa secara percuma menggunakan talam kepada warganya di masjid UMP di kedua-dua kampusnya di Gambang dan Pekan.

Seperti tahun-tahun sebelumnya, juadah seperti nasi minyak, nasi arab dan gulai kawah akan dihidangkan dalam talam untuk hidangan antara lima hingga enam orang dan konsep bertalam ini adalah diambil dari sunnah Rasulullah saw yang banyak memberi manfaat dan merapatkan silaturahim antara satu sama lain.

Bagi pelajar antarabangsa dari Pakistan, Mohd Khan, 30, berkata, amalan berbuka puasa beramai-ramai itu memberikan pengalaman menarik kepada dirinya.

Dia yang merupakan siswazah pengajian Doktor Falsafah Bioteknologi berkata, tahun ini merupakan tahun keempat beliau menyertai program tersebut.

"Saya gembira apabila dapat bersama-sama rakan-rakan berbuka puasa beramai-ramai. Sekurang-kurangnya dapat mengurangkan kerinduan terhadap keluarga.

"Saya juga tidak melepaskan peluang untuk bersama-sama mengerjakan Solat Tarawih di Masjid UMP setiap kali menjelang bulan Ramadan," katanya.

Sementara itu, Naib Canselor UMP, Prof. Dato' Dr. Daing Nasir Ibrahim berkata, tradisi berbuka puasa terus dikekalkan di universiti itu sejak dimulakan beberapa tahun lalu.

"Pelajar di sini terdiri daripada pelbagai latar belakang dan budaya, justeru, kita harap melalui program ini dapat merapatkan ukhuwah antara warga kampus.

"Lebih menarik segala perbelanjaan adalah hasil kutipan daripada staf secara tunai mahupun melalui potongan gaji dalam kalangan staf universiti yang berhasrat bersedekah dalam memanfaatkan bulan yang penuh keberkatan selain sumbangan turut diterima daripada pihak luar termasuk individu dan pihak korporat yang menyumbang untuk Tabung Ramadan," katanya.

Dalam pada itu, beliau berkata, UMP turut memperkenalkan program MyGift sebagai satu usaha mengumpul sumbangan daripada mana-mana pihak bagi menyalurkan sumbangan bagi tujuan tajaan pelajaran, penyediaan kemudahan prasarana kepada pelajar mahupun membudayakan semangat membantu bagi golongan yang memerlukan.